

**ՀԱՍՏԱՏՎԱԾ Է**

«Հայաստանի ավտոապահովագրողների բյուրո»

ԻԱՄ խորհրդի

13/09/2010թ թիվ 10-Լ որոշմամբ

«Հայաստանի ավտոապահովագրողների բյուրո»

ԻԱՄ խորհրդի նախագահ

**ԳՐԱՆՑՎԱԾ Է**

ՀՀ կենտրոնական բանկում

«14» սեպտեմբերի 2010թ

ՀՀ կենտրոնական բանկի նախագահ

-----

-----

**ԿԱՆՈՆ**

**«ՀԱՅԱՍՏԱՆԻ ԱՎՏՈԱՊԱՀՈՎԱԳՐՈՂՆԵՐԻ ԲՅՈՒՐՈ»  
ԻՐԱՎԱԲԱՆԱԿԱՆ ԱՆՁԱՆՑ ՄԻՈՒԹՅԱՆ**

# ԱՊՊԱ ՎԿԱՅԱԳԻՐԸ ԿԱԶՄԵԼՈՒ ԵՎ ԼՐԱՑՆԵԼՈՒ ՀՐԱՀԱՆԳԸ

## ԳԼՈՒԽ 1. ԱՊՊԱ ՎԿԱՅԱԳՐԻ ԿԱԶՄՄԱՆԸ ԵՎ ԼՐԱՑՄԱՆԸ ՆԵՐԿԱՅԱՑՎՈՂ ԸՆԴՀԱՆՈՒՐ ՊԱՀԱՆՁՆԵՐԸ

1. Սույն հրահանգում օգտագործվող հասկացություններն ունեն Հայաստանի Հանրապետության քաղաքացիական օրենսգրքում և «Ավտոտրանսպորտային միջոցների օգտագործումից բխող պատասխանատվության պարտադիր ապահովագրության մասին» Հայաստանի Հանրապետության օրենքում կիրառվող նշանակությունը:

2. ԱՊՊԱ վկայագիրը (այսուհետ՝ Վկայագիր), ինչպես նաև սույն հրահանգով նախատեսված դեպքում Վկայագրի հավելվածները կնքվում (ստորագրվում, իրավաբանական անձ կողմերի մոտ կնիքի առկայության դեպքում՝ նաև դրոշմակնքվում) են երկու օրինակից, որոնցից մեկ օրինակը՝ կից ԱՊՊԱ պայմաններով, տրվում է Ապահովադրին (Ապահովադրի լիազորված անձին), իսկ մյուս օրինակը պահվում է Ապահովագրողի (Ապահովագրողի լիազորված անձի կամ ապահովագրական գործակալի) մոտ: Վկայագրի, ինչպես նաև սույն հրահանգով նախատեսված դեպքում Վկայագրի հավելվածների՝ Ապահովագրողի օրինակին ԱՊՊԱ պայմանները չեն կցվում: Վկայագիրը և ԱՊՊԱ պայմանները, ինչպես նաև սույն հրահանգով նախատեսված դեպքում Վկայագրի հավելվածները տրամադրվում են Ապահովադրին (Ապահովադրի լիազորված անձին) միմյանց կարված կամ տեխնիկական այլ միջոցներով ամրացված ձևով:

3. Վկայագրի տվյալները լրացվում են մեկ էջի վրա՝ բացառությամբ այն դեպքերի, երբ Վկայագրով ապահովագրվում է մեկից ավելի ավտոտրանսպորտային միջոց և/կամ լիազորված տիրապետողների քանակը մեկից ավելի է: Այս դեպքերում բոլոր ավտոտրանսպորտային միջոցների և/կամ լիազորված տիրապետողների վերաբերյալ, ինչպես նաև դրանց հետ կապված այլ տեղեկատվությունն արտացոլվում է առանձին թղթի վրա՝ սույն որոշմամբ հաստատված Հավելված 1-ի համապատասխանաբար Հավելված 1.1-ով և (կամ) Հավելված 1.2-ով սահմանված ձևով: Ընդ որում, ավտոտրանսպորտային միջոցների և լիազորված տիրապետողների քանակից կախված՝ կարող են ավելացվել համապատասխան քանակով տողեր:

4. Վկայագիրը լրացվում է Ապահովագրողի աշխատակցի, լիազորված անձի կամ գործակալի կողմից ձեռագիր կամ համակարգչի կիրառման միջոցով, իսկ սույն հրահանգի 3-րդ կետով սահմանված հավելվածները՝ միայն համակարգչի կիրառման միջոցով՝ սույն հրահանգով սահմանված կարգով:

5. Մեկ պայմանագրով մեկից ավելի ավտոտրանսպորտային միջոցների օգտագործումից բխող պատասխանատվությունն ապահովագրելու և/կամ Պայմանագրով մեկ ավտոտրանսպորտային միջոցի համար մեկից ավելի լիազորված տիրապետողներ նախատեսելու դեպքերում Վկայագրին կցվում են համապատասխանաբար սույն հրահանգի Հավելված 1.1-ով և (կամ) Հավելված 1.2-ով սահմանված ձևերով հավելվածները:

6. Ձեռագիր լրացվող Վկայագրերի համար՝ Վկայագրի ձեռագիր լրացվող դաշտերը լրացնելիս օգտագործվում է գնդիկավոր գրիչ: Ձեռագիր լրացված Վկայագիրը և դրա արտատպված երկրորդ օրինակը պետք է լինեն հեշտ ընթեռնելի:

7. Էլեկտրոնային եղանակով համակարգչի միջոցով լրացվող ԱՊՊԱ պայմանագրերը տպվում են A4 ֆորմատի թղթի վրա՝ սև գույնով (բացառությամբ ընկերության լոգոտիպի գույնի, որի ընտրությունը կատարվում է տվյալ ընկերության կողմից) և առնվազն 9 մմ. տառաչափով (բացառությամբ պայմանագրի տողատակի նշումների), «Թայմս Արմենիան» տառատեսակով, իսկ պայմանագրերի առաջին էջերը (վկայագրերը) տպվում են Բյուրոյի կողմից տրամադրված ձևաթղթերի վրա:

8. Բյուրոյի կողմից տրամադրված էլեկտրոնային եղանակով՝ համակարգչի միջոցով լրացվող ձևաթղթերի վրա պայմանագրերը տպագրվում են այնպես, որպեսզի պահպանվեն արտացոլման ենթակա բոլոր տվյալները՝ ըստ սույն որոշմամբ սահմանված հաջորդականության: Բյուրոյի անդամ ապահովագրական ընկերությունները կարող են ըստ հաջորդականության պահպանելով սահմանված բոլոր տվյալները և պահանջները՝ փոփոխել յուրաքանչյուր դաշտի համար հատկացված լրացման դաշտի չափը:

9. Ապահովադրին տրամադրվող Վկայագրի օրինակին ԱՊՊԱ պայմանների հետ կցվում է նաև Հայաստանի Հանրապետության կենտրոնական բանկի խորհրդի 2009 թվականի հունիսի 2-ի թիվ 166 Ն որոշմամբ հաստատված «Բանկերի, վարկային կազմակերպությունների, ապահովագրական ընկերությունների, ապահովագրական բրոքերների, ներդրումային ընկերությունների, Կենտրոնական դեպոզիտարիայի և դրամական փոխանցումներ իրականացնող վճարահաշվարկային կազմակերպությունների կողմից տեղեկությունների հրապարակումը» կանոնակարգ 8/03-ի Հավելված 9-ով սահմանված Վեճերի լուծման բացատրական ամփոփագիրը:

## **ԳԼՈՒԽ 2. ԱՊՊԱ ՎԿԱՅԱԳՐԵՐԻ ԼՐԱՑՄԱՆ ԿԱՐԳԸ**

10. Վկայագրի վերևի ձախ մասում՝ «Ապահովագրական ընկերության լոգոտիպը» դաշտում տպվում է Ապահովագրողի լոգոտիպը, իսկ «*Վկայագիր N*» դաշտում՝ վանդակների մեջ, տպվում է վկայագրի սերիան և հերթական համարը՝ Բյուրոյի խորհրդի կողմից սահմանված պահանջներին համապատասխան:

11. Վկայագրի «*Ապահովագրող*» դաշտում լրացվում է ապահովագրական ընկերության անվանումը, գտնվելու վայրի հասցեն, հեռախոսահամարները (որով ապահովագրական պատահարի մասին կարելի է տեղեկացնել Ապահովագրողին), ֆաքսը, էլեկտրոնային փոստի հասցեն, ինտերնետային կայքը, Հայաստանի Հանրապետության կենտրոնական բանկում գրանցման համարը, լիցենզիայի համարը, ՀՎՀՀ-ն, բանկային հաշիվը:

12. Վկայագրի *1-ին*՝ «*Ապահովադիր*» դաշտում, լրացվում է՝

1) *Ֆիզիկական անձի դեպքում՝*

ա. անունը, ազգանունը,

բ. Հայաստանի Հանրապետության կառավարության 1999 թվականի դեկտեմբերի 22-ի թիվ 767 որոշմամբ հաստատված անձը հաստատող փաստաթղթերից որևէ մեկի համարը, ում կողմից է տրվել, անձը հաստատող փաստաթղթի տրման ամսաթիվը,

գ. սոցիալական ապահովության քարտի համարը (առկայության դեպքում),

դ. ծննդյան ամսաթիվը,

ե. բնակության և հաշվառման հասցեները (եթե դրանք չեն համընկնում),

զ. վարորդական վկայականի համարը, տրման ամսաթիվը, վարորդական ստաժը

է. հեռախոսահամար(ներ), էլեկտրոնային փոստի հասցեն (առկայության դեպքում)

2) *Իրավաբանական անձի դեպքում՝*

ա. լրիվ անվանումը,

բ. ՀՎՀՀ,

գ. պետական գրանցման վկայականի համարը,

դ. գրանցման երկիրը և գտնվելու վայրը (մարզ, համայնք, փողոց, տուն/շենք, բնակարան),

ե. հեռախոսահամար(ներ),

զ. Ապահովագրողի ցանկության դեպքում կարող են լրացվել նաև բանկային հաշվի համարները:

3) *Հայաստանի Հանրապետության դեպքում՝*

ա. պետության անունից հանդես եկող մարմնի անվանումը,

- բ. պետության անունից հանդես եկող մարմնի հասցեն (մարզ, համայնք, փողոց, տուն/շենք, բնակարան),
- գ. հեռախոսահամար(ներ),
- 4) Օտարերկրյա պետության դեպքում՝  
 ա. երկիրը,  
 բ. օտարերկրյա պետության անունից հանդես եկող մարմնի անվանումը (դեսպանատուն, հյուպատոսարան, այլ),  
 գ. օտարերկրյա պետության անունից հանդես եկող մարմնի հասցեն (մարզ, համայնք, փողոց, տուն/շենք, բնակարան),
- 5) Համայնքի դեպքում՝  
 ա. համայնքի անվանումը  
 բ. համայնքի անունից հանդես եկող մարմնի անվանումը,  
 գ. համայնքի անունից հանդես եկող մարմնի հասցեն (մարզ, համայնք, փողոց, տուն/շենք, բնակարան),
- 6) Միջազգային կազմակերպության դեպքում՝  
 ա. միջազգային կազմակերպության անվանումը,  
 բ. միջազգային կազմակերպության հասցեն (մարզ, համայնք, փողոց, տուն/շենք, բնակարան):

13. Վկայագրի **2-րդ՝ «Ավտոտրանսպորտային միջոցների (Ա/մ) քանակ» դաշտում** լրացվում է այդ Վկայագրով ապահովագրվող ավտոտրանսպորտային միջոցների քանակը: Եթե նշված դաշտում լրացվում է 1-ից ավել թիվ, ապա Վկայագրի 3-րդ, 4-րդ, 5-րդ և 6-րդ դաշտերը չեն լրացվում, իսկ այդ դաշտերում լրացման ենթակա տեղեկատվությունն արտացոլվում է սույն հրահանգի 5-րդ կետով սահմանված կարգով:

14. Վկայագրի **3-րդ՝ «Ավտոտրանսպորտային միջոց (Ա/մ)» դաշտում**, լրացվում են այն ավտոտրանսպորտային միջոցի տեսակը (օրինակ՝ մարդատար, բեռնատար և այլն), մակնիշը (տիպարը) (օրինակ՝ BMW-X5-4.4L), հաշվառման համարանիշը, հաշվառման վկայագրի (մաքսային հայտարարագրի) համարը, շարժիչի հզորությունը, շարժիչի համարը, թափքի համարը (առկայության դեպքում), նույնացման համարը (VIN), վազքը (կմ), թողարկման տարեթիվը և գույնը, որի օգտագործումից բխող պատասխանատվությունն ապահովագրվում է: Սույն կետով պահանջվող տվյալները լրացվում են՝ հիմք ընդունելով ավտոտրանսպորտային միջոցի հաշվառման վկայագրում (մաքսային հայտարարագրում) առկա տեղեկատվությունը, իսկ դրա բացակայության դեպքում՝ ապահովադրի ներկայացրած այլ փաստաթղթերը կամ տեղեկությունները: Վազքը լրացվում է՝ հաշվի առնելով պայմանագրի կնքման պահին ավտոտրանսպորտային միջոցի վազքի ցուցանիշը:

15. Վկայագրի **4-րդ՝ «Ծահագործման նպատակ» դաշտում** լրացվում է ավտոտրանսպորտային միջոցի օգտագործման նպատակը պայմանագրի գործողության ընթացքում: Այն լրացվում է Ապահովադրից ստացված տեղեկատվության համաձայն: Այս բաժնում կատարվում են հետևյալ նշումները՝

- 1) **«անձնակալ»**, երբ ավտոտրանսպորտային միջոցն օգտագործվելու է անձնական նպատակով,
- 2) **«ծառայողական»**, երբ ավտոտրանսպորտային միջոցն օգտագործվելու է ծառայողական նպատակների համար,
- 3) **«տաքսի»**, երբ ավտոտրանսպորտային միջոցն օգտագործվելու է որպես տաքսի,
- 4) **«հանրային տրանսպորտ»**, երբ ավտոտրանսպորտային միջոցն օգտագործվելու է որպես հանրային տրանսպորտ (օրինակ՝ միկրոավտոբուսներ, ավտոբուսներ, տրամվայներ, տրոլեյբուսներ):
- 5) **«առևտրային օգտագործման»**, երբ ավտոտրանսպորտային միջոցն օգտագործվելու է ապրանքներ առաքելու և (կամ) ծառայություններ մատուցելու նպատակով:

6) **«այլ»**, այն ավտոտրանսպորտային միջոցները, որոնք օգտագործվելու են սույն կետի 1-5-րդ ենթակետերով նախատեսվածից տարբերվող նպատակներով:

16. Վկայագրի 4-րդ՝ «շահագործման ձև» դաշտում թույլատրվում է կատարել միայն մեկ նշում: Այն դեպքում, երբ ավտոտրանսպորտային միջոցը դասվում է ծառայողական կամ անձնական և միևնույն ժամանակ առևտրային օգտագործման հատկանիշներին, ապա Վկայագրում նշվում է, որպես **առևտրային օգտագործման**:

17. Վկայագրի 5-րդ՝ «**Շահագործման հիմնական վայրը**» դաշտում Ապահովադրից ստացված տեղեկատվության հիման վրա կամ դրա բացակայության դեպքում՝ ըստ ավտոտրանսպորտային միջոցի գրանցման վկայագրի տվյալների՝ լրացվում է ավտոտրանսպորտային միջոցի օգտագործման այն մարզը կամ նշում է կատարվում «Երևան» դաշտում, որտեղ նախատեսվում է վարել ավտոտրանսպորտային միջոցը: Եթե որպես շահագործման վայր նշվում է որևէ մարզ, ապա լրացուցիչ նշում է կատարվում նաև «գյուղական» կամ «քաղաքային» դաշտերից որևէ մեկում:

18. Վկայագրի **6-րդ՝ «Լիազորված տիրապետողներ» դաշտում** Ապահովադրի հայեցողությամբ լրացվում է հետևյալ չորս տարբերակներից որևէ մեկը՝

- 1) դրվում է «-» (գծիկ) նշանը, որը նշանակում է, որ լիազորված տիրապետող է համարվում տվյալ Վկայագրով նախատեսված Ապահովադիրը,
- 2) նշվում են այն անձանց ցանկը և նրանց վերաբերյալ սույն հրահանգի 12-րդ կետի առաջին ենթակետով սահմանված տվյալները, որոնց օրինական տիրապետմանը ապահովադիրը նախատեսում է տրամադրել ավտոտրանսպորտային միջոցը կնքվող պայմանագրի գործողության ժամկետում: Սա նշանակում է, որ Ապահովադրից բացի՝ լիազորված տիրապետողներ են համարվում նաև տվյալ անձինք,
- 3) կատարվում է «**Առանց սահմանափակումների**» նշում, որը նշանակում է, որ Վկայագրով Ապահովադիրը հայտարարում է, որ պայմանագրի գործողության ընթացքում իր կողմից վստահված ցանկացած անձ կարող է տիրապետել ավտոտրանսպորտային միջոցը և այդ անձը համարվում է լիազորված տիրապետող,
- 4) Այն դեպքում, երբ լիազորված տիրապետողների քանակը մեկից ավելի է, նշում է կատարվում «համաձայն Հավելվածի», և վկայագրին կցվում է սույն Հրահանգի Հավելված 1.2-ով սահմանված ձևի հավելված, որտեղ արտացոլվում է բոլոր լիազորված վարորդների վերաբերյալ տեղեկատվությունը:

19. Վկայագրի **7-րդ՝ «Ապահովագրության ժամկետ» դաշտում** լրացվում է ապահովագրության սկիզբը և ավարտը՝ օր/ամիս/տարի/ժամ/ ֆորմատով:

20. Վկայագրի **8-րդ՝ «Ապահովագրական գումար» դաշտը** լրացման ենթակա չէ:

21. Վկայագրի **9-րդ՝ «Չհատուցվող գումար» դաշտում** նշում է կատարվում «չի կիրառվում» վանդակում:

22. Վկայագրի **10-րդ՝ «Ապահովագրավճար» կետում** լրացվում է Ապահովադրի կողմից Վկայագրով վճարման ենթակա ապահովագրավճարի մեծությունը՝ թվերով և փակագծի ներսում՝ տառերով: Այն դեպքում, երբ պայմանագրով ապահովագրվում են մեկից ավելի ավտոտրանսպորտային միջոցներ, ապա այս մասում նշվում է բոլոր ավտոտրանսպորտային միջոցների համար Վկայագրով նախատեսված ընդհանուր ապահովագրավճարը, իսկ յուրաքանչյուր ավտոտրանսպորտային միջոցի համար սահմանված ապահովագրավճարը նշվում է Վկայագրին կցվող հավելվածի համապատասխան դաշտում:

23. Վկայագրի **11-րդ՝ «Ապահովագրավճարի վճարման կարգը» դաշտում** նշում է կատարվում ապահովագրավճարի վճարման ձևի մասին, մասնավորապես, կանխիկ կամ անկանխիկ՝ միանվագ կամ տարաժամկետ վճարման եղանակներով: Կանխիկ դաշտում նշում կատարելու դեպքում նշվում է Վկայագրի նույն հորիզոնականում նշված երկու տարբերակներից որևէ մեկը՝ կախված նրանից, թե Ապահովադիրը վճարման տարբերակներից ինչպիսի տարբերակ է ընտրել, ընդ որում, երկրորդ տարբերակը նշվելու դեպքում նշվում է նաև վճարված ապահովագրավճարի չափը և ապահովագրավճարի

մնացած մասի վճարման կոնկրետ կարգն ու ժամկետները: Անկանխիկ դաշտում նշում կատարելու դեպքում նույն հորիզոնականում նշվում են ապահովագրավճարի վճարման կոնկրետ կարգն ու ժամկետները (օր.՝ 20.000 ՀՀ դրամը վճարվում է մինչև 16.05.2011 թ., իսկ մնացած 20.000 ՀՀ դրամը՝ մինչև 11.05.2012 թ.՝ յուրաքանչյուր ամիս հավասար չափաբաժիններով):

24. **Վկայագրի 12-րդ, 13-րդ և 14-րդ կետերը** լրացման ենթակա չեն: Դրանք սահմանվում են օրենքով և «Հայաստանի ավտոապահովագրողների բյուրո» ԻԱՄ խորհրդի կողմից հաստատված պայմաններով, որտեղ *Ապահովագրողն իրավունք չունի կատարելու փոփոխություններ:*

25. Վկայագրի **15-րդ կետի 1-ին սյունակում՝ «Ապահովագրողի անունից»**, լրացվում է Ապահովագրական ընկերության գործադիր մարմնի ղեկավարի անուն ազգանունը, ստորագրությունը: Եթե Վկայագիրը ստորագրվում է **Ապահովագրողի կողմից լիազորված անձի կողմից, ապա «Ապահովագրողի անունից» բաժնում նշվում է լիազորված անձի անունը, ազգանունը, անձնագրային տվյալները, լիազորագրի համարը և տրման ամսաթիվը**, իսկ ապահովագրական գործակալի կողմից Վկայագիրը ստորագրվելու դեպքում՝ **գործակալի համապատասխան տվյալները: Այս մասում** դրվում է Ապահովագրական ընկերության կամ նրա կողմից լիազորված անձի կամ գործակալի կնիքը (առկայության դեպքում):

26. Վկայագրի **15-րդ կետի 2-րդ սյունակում՝ «Ապահովադրի անունից»** մասում նշվում է Ապահովադրի անուն ազգանունը և ստորագրությունը, իսկ ոչ ֆիզիկական անձ Ապահովադրի դեպքում՝ Ապահովադրի գործադիր մարմնի ղեկավարի անունը և ազգանունը, ստորագրությունը և կազմակերպության կնիքը (առկայության դեպքում): Այն դեպքում, երբ Ապահովադրի անունից հանդես է գալիս լիազորված անձ, ապա այս մասում նշվում է լիազորված անձի անունը, ազգանունը, անձնագրային տվյալները, լիազորագրի համարը և (կամ) տրման ամսաթիվը, լիազորված անձի ստորագրությունը:

27. Վկայագրի **16-րդ «Պայմանագրի կնքման և Ապահովադրին տրման ամսաթիվ» դաշտում** լրացվում է Ապահովադրին Վկայագիրը տալու ամսաթիվը՝ օր/ամիս/տարի/ֆորմատով:

28. Վկայագրի «Նշումներ» մասում կատարվում է «Կրկնօրինակ» և նախկին Վկայագրի համարի նշումը, երբ Վկայագիրը վնասվել (խտանվել), կորել, հափշտակվել կամ ոչնչացվել է և Ապահովադրի (Ապահովադրի լիազորված անձի) դիմումի հիման վրա նրան տրվել է նոր հերթական համարով Վկայագրի կրկնօրինակ: